



1 2004
3452к

ДУЛАТ
ИСАБЕНОВ



ЕКІ
ЖИЛЬІРМА



ДУЛАТ ИСАБЕНОВ
ЕКІ ЖИЛЫРМА





1 2004/3452к
ДУЛАТ
ИСАБЕКОВ


**ЕКІ
ЖИҮРМА**

ПОВЕСТЕР



Қайта басылым

АЛМАТЫ
«Жазушы» баспасы
1983

Каз 2
и 83



KX





ГАУЫР ТАС

Ұбыштың мінез-құлқы, кескін-келбеті, аузындағы сөзі мен құлқісіне шейін әкемнен аумай қалған, сойып қаптағандай дерсің. Екі иығы қақпақтай, менен екі есе бар. Шешінгенде білегіндегі білем-білем бұлшық еттер арасында шортан жүргендей бұлт-бұлт етіп ойнап шыға келеді. Ол асығу дегенді әсте білген жан емес. «Ойбай, тұр, қойға қасқыр шапты!»— десең де орнынан жайбақат көтеріліп, майман-майман басып барып жарбиған жаман кепеден ер-тоқымын алады, соナン соң үйде қалған қамшысына қайта келеді. Содан кейін барып байлаудағы күрең қасқаны асықпай ерттей бастайды. Оған шейін кеудесінде жаны бар қасқыр койды қырып бітеді фой, сондықтан ол сайланып шықканша кой соңынан мен кете тұрамын. Экем Ұбыштың осы жайбаракаттығын ғана жаратпайды. Басқа жағынан Ұбыш ол үшін жігіттің сұлтаны, нағыз еркек. Күш дегенің оның бойна сыймай, асып-төгіліп жатыр. Аузын шымшып тіккен екі орыс қабың Ұбыш үшін түк емес. Қауын көтергендей екеуін екі қолтығына қысып алады да алдында кездесе қалған анау-мынау арық-атызыңдан аттап-бұттап жүре береді. Сондықтан да біздің үй ақ қапшық дегенді ұстамайды. Анау азық кепедегі маса қонса жарылғалы тұрған ала қап, қара қап, шұбар қап дегендердің бәрін апамның өзі тоқыған.

Ұбыштың айрықша бір мінезі — көкпар құмарлығында. Көкпар хабары шықса Ұбышты тану мүмкін емес. Жалпақ танауы балықтың желбезегіндегі желп-желп етіп, үлкен кой көздері қызыл көрген аш бүркіттің жанарындағы от шашып шыға келеді. Қой бағу, қозы төлдес-

ту дегенің жайына қалады. Атын таң асырып, жалын тарал, тұнімен ұйықтамай шығады. Тіпті, бөшкедегі ауыз судан екі-үш шелегін алғып, күреңін жалт-жұлт еткізіп жуып қояды. Су таситын мен. Сондықтан, балапанын қорғаған қызығыштай шырылдаймын да қаламын. Бірақ әкем бір саусағын ғана қимылдатып мені өзіне шақырып алады да: «Койға бар, қиналсаң суды өзім-ақ әкелемін», — дейді ақырын ғана. Үбыштың атқұмарлығы мен шабандоздығына әкем қашан да разы. Көкпар болады деген хабарды да алдымен өзі айтып келеді. Үлкен баласының мен сияқты емес, қайратты, шабандоз, көп сейлемейтіндігін ол мактанды тұтады. Сондықтан, көкпар хабары сонау Қазықұрттың бауырынан шықса да, Үбыштың баруын әкем іштей тілеп отырады. Мұндай кездерде ол оған ерекше мейірімді де, шешіліп сөйлегіш. Әйткені көкпар ата мен бабаның атын шығаратын, данқа бөлейтін қасиетті бәйге. Ал, көкпар болмайтын күндері ол Үбышты уысынан шығармай берік ұстайды. Біз бәріміз де оның ызғарлы жүзінен ығысып жүре береміз. Тау қопарап еңгезердей Үбышың да оның алдында бір уыс мактадай бола қалады. Сондықтан, мен өзім шаппасам да көкпар хабары шықса екен деп тілеп жүремін. Онда, үй ішіне жылдылық, көңілділік енеді.

Әкем де, Үбыш та осы кезге шейін бетімнен бір сүйген емес, тіпті, айналайын деген сөзді айтқан-айтпағандары да есімде жоқ. «Баланы айналып-толғана берсең әйел тәрізді сынық, жасық бол кетеді» деген әкемнің сөзін әлденеше рет естігенмін.

Міне, бұғін де үнсізбіз. Анадай жердегі сыйырлауық ағаш кереуеттің үстінде бәтес көрпені айқара жамылып Үбыш жатыр. Ойна ешиәрсе кіріп шығар емес. Мен ертең окуға жүремін. Алыска, Алматыға кетемін. Апам айтқандай «әзірет сұлтанның аруағы қолдап, бағым жанса түсемін, түспесем қайтып келемін. Оқымасам да күн көруге болады. Іс қып, дең сау болсын».

Әкем үйде жоқ, қайда кеткені де белгісіз. Жалпы ол үлкен бір іске аттанарда мақсатын ешкімге айтпауды әдетке айналдырып, қанына сінірген. Әйтеуір, бұғін кешке келетіні ғана белгілі, бірақ қазір тұн жарымы бол қалды, неге екені белгісіз, кешігіп жатыр. Үбыш қимылдар емес. Жатар алдында таңертең ерте тұрып, мені темір жол станциясына шейін күрең қасқамен апарып тастауға келіскен. Ол осының өзіне әрен қөнді. Ат шаршайды. Есекпен-ақ барсаншы. Жеткен соң есекті Солыбектің бастырмасына байлап кете сал, бір барғанда

«**әкелерміз**»— деп күңгірлекен. Бірак, араға апам араласып: «Мейрімсіз, олай деуге қалай дәтің барады? Қарғадай балаға жаңың ашыса қайтеді. Өліп қалмас атың. Бөтен емес, інің ғой әйтеуір»— деген соң біраз үндемей отырып келіскең рай білдіріп жантая кеткен. Эне, сол бойы ұйықтап кетіпті. Көнетоз қара шабаданға бар тапқан-таянғанын салып, апам байрұс қана көбелектей шарқ ұрып жүр. «Әдірә қалғыр, мейрім бар дейсің бебуларда. Бауыр еті жалғыз інісі алысқа кетіп бара жатқанда қайтіп қана ұйықтайды екен»...— деп, анда-санда қапалана сөйлеп қояды. Сонан соң төсекте жатқан мениң қасыма келіп шашымнан сипап, бетімнен қайта-қайта сүйе береді. Сол сэтте оның көзінен жып-жылы жас бетіме тамып кетеді. Менің де көңілім босайды. Бұл — әкем айтқандай жасықтықтан емес, мен кеткен соң апама мына үйдің ішінде көңілсіз болатынын ойлағандықтан еді.

Бір кезде тігулі үйдің алдынан ат дүбірі естілді. Сәлден соң үйге әкем кіріп келді.

— Жатпағансыңдар ма,— деді ол камшысын керегенің басына іліп жатып. Үнінде бір жылылық бар секілді. Мен қуанып кеттім. Тым болмаса, окуға жүрер кезімде мейрімді болса екен.

— Жок,— деп апам орнынан тұрды да ас қамына кірісе бастады.

— Эуре болма,— деді әкем жай ғана.— Оны қоя тұр. Дудар бас ояу ма? (Әкем мені осылай атайдын.)

— Қазір ғана жатты. Ертең окуға жүреді ғой...

Әкем қайтып ләм демеді. Күн ысымак түгілі аспан айналып жерге түсіп кетсе де, үстінен тастамайтын тер сіңген сары күпәйкесі мен қызыл брезент етігін шешіп, менің дәл жанымдағы салулы төсекке келіп отырды. Апам да үнсіз, мен де үнсіз. Әкемнің әлдекалай айтар жаңалығы бар секілді. Сондай кездерде ылғи осылай ұзак уақыт тіс жармай отырады.

— Дудар бас,— деді ол бір кезде салмақты қоңыр үнмен. Мен селт ете түстім.

— Әу, көке.

— Дағаға шығып, қойларды көріп кел. Шарбак қораны бұзып шығып кететін жындары бар еді.

Ішім әлденені сезіп, басқа бір сөзге келместен орнынан тұрдым да, аяғыма апамның кебісін сұға салып сыртқа шықтым. Жұлдыздар жайнап тұр екен. Ай қызыл бол сонау Қаратудың ар жағынан енді көтеріліп келе жатыр. Оты сөнген ошақ басында Байқаншық

жатыр. Әріде, карауытқан төбенің бергі етегінен Сырттанның әул-әуп үргені естіледі. Ойпандағы қамаулы қойлар мамыражай күйсеп жатыр. Кораны бұзып шығу түгілі айдасаң да қозғалар түрі жок. Қаша шаруақор, малжанды болса да, дәл осы жолы әкем мені шын ние-тімен қойды көруге жібермегешіп салған жерден-ақ біл-геннін. Сондықтан, шошаң етіп үйге қайта кіруді жөн көрмей, әбден әңгімелесіп болды-ау дегенше далада жүрдім. Және ол ешқашан сары езулікке салынып отырмайды, айтарын қысқа-қысқа етіп актарып салуға әдет-тengen.

Бір кезде үйге бетtedім. Келе жатқанымды білдіріп, тамағымды бір кенеп алдым да, киіз үйдің алаша есігін айқара ашып ішке кірдім. «Не сөйлесті екен? Мен есті-меуге тиісті қандай сөз болды ол?»

Табалдырықтан аттай бергенде әкемнің қарсы алдында малдас құрып отырған Үбыштың еңгезердей де-несін көрдім. Оның үйқысы әлі жөнді ашылмаса керек, ішке кірген маған бұрылыш қарағанда қабағы ісініп, көз еттері білемденіп түр екен. Ұстарамен кеше ғана тықырлап қырдырған басы күңгірт шам сәулесінің өзі-мен-ақ қозғалған сайын жылт-жылт ете қалады. Шамасы, айтылар сөз айтылып бітсе керек. Ол мен ішке енген кезде: «Кайтеміз, мейлі енді» деп күңк етіп орнынан тұрды да, төсегіне барып жатып қалды. Маған бәрі жұмбак. «Ол не?»— деп сұрауға батылым жетпеді. Сол жұмбак әкем мен Үбыш үйықтаған соң ғана шешілді. Тұн жарымы ауғанда апам қасыма келіп, болған жайдың бәрін сыйырлап айтып берді.

...Сонымен Үбыш үйленетін болыпты. Бұл мен ешқашан күтпеген, тіпті үш үйықтасам ойыма кіріп шықнаған жаңағын еді. Эрине, Үбыштың ерте ме, кеш пе әйттеуір бір кезде әйел алып, отау тігетініп білетінмін. Бірақ оның үйленетіндігі туралы хабар дәл осылай аяқ астынан шығып, мен даладан үйге кіргенше барлық мәселе шешіліп бітерін күтпеп едім. Және оның: «Кайтеміз, мейлі енді» деуі құлағынан таң атқанша ызындал кетпей қойды. «Сұмдық-ай, неткен мінез? Адамда толку, тебірену деген болмай ма бұл,— деймін ішімнен аспандағы ақырын ғана жылжып бара жатқан жұлдыздарға ашық түндіктен карап жатып.— Ол үйленеді ғой. Ғұмырлық жар сүйеді, оған жас өміріндегі осындай ұлы өзгерістің өзі қой жоғалғандай әсер етпегені ме? Былтыр қыста екі саулықты қасқыр жең кеткенде бұдан гөрі қаттырақ толғанып еді ғой. Қараши әне, ештеңе бол-

мағандай бейғам жатыр. Япымай, шынымен үйктаң кетті ме екен ол?»

Мен жеңешемнің болуын армандайтынмын. Табан астынан бола кеткен бұл тілек алғашында қатты таңдандыrsa да дәл қазір даладағы мұлгіген тыныштыққа құлақ тігіп, кірпік қақпай жаткан шағымда маған тәтті бір қуаныші лебін әкелгендей болды. Кеудемдегі жүргім самал тербegen қайың жапырағындаи лүп-лүп етіп, болашақ жеңешемнің ақылды, ажарлы, бар мінезі әкем мен Үбыштың мінезіне қарама-карсы ашық жарқын болуын аңсадым. Бәлкім сонда, темір тәртіп мекендеген, салқынқандылық салтанат құрған мынау үйге бір өзгеріс еніп, көңілсіз өмірге құлкі араласар. Ол да мен сияқты қиялшыл болса бірге отырып арман қуар едік, Үбыштың түйық мінезіне тұрткі салып, сезімін сергітуге екеуlep бір әрекет жасап көрөр едік.

Мен осыны ойлап қуандым. Сол қуаныш босағаны аттап кірумен бірге менің ертеңгі алыс сапарымның тасталқанын шығарды. Үбыштың үйленуіне байланысты әкем: «Дудар бас окуды биылша қоя тұрсын. Келім-кетім кісі бар, күтіп алар коңақ бар, ол кеткен соң мына малды кім бағады. Келін тұскен соң келесі жазда баар окуына. Бір жыл кейін ояз болса да кештік қылmas»,— денті.

Мен әкемнің бұл шешіміне қарсы бола қойған жоқпын. Абыр-сабыр кезеңде айдаладағы жалғыз үй қойшыға адам қолы аса қажет болатынын түсінсем, жаман болсын, жаксы болсын, туған ағамның үш күннен кейін келіншек әкелетінін біле тұра, сол қуанышқа ортактаспай, өз жөніммен аттанып кете беруім бүйрексіздік болар деп түйдім. Биылша окуды қоя тұруға келіскенімді естігендे апам қатты қуанды. Оның ойынша «биыл мен әлі тым жаспын. Келесі жылы буным қатаяды. Оң қол, сол қолымды анық танимын, сол кезде алыста жүрген мені уайымдал апам да қатты кинала бермейтін болады».

Ұядағы жұмыртқа пісіп, қарғаның миы қайнайтын жаз айының от шашқан бір күнінде Үбыш қасына екі жігіт пен тағы бір екі ақсақалды ертіп Тоғансайға жол тартты. Әдетте, әке тәрбиесінен өзгені көрмеген Үбыш тәрізді жас жігіттерге: «Үйленесің бе?» деп сауал салғанда, көкей деген құрғырдың: «Енде ше, осы күнді сарғая күткен жоқпын ба?» деп тұрткілеп тұрса да «көйнізшы, көке» деп үяла жауап берер еді. Үбыш мұлде олай әткен жоқ. Мен окуға бармайтын бол бекігенді түні

ертеңіне әкем: «Ашып айтсаңшы, Қыжым кемпірдің қызына үйленуге қарсы емессің бе?» дегенде тоңазыған сұр ет пен майлы айранды соғып отырып: «Е, жок-ә, оның жаманшылығын көрген кім бар. Жақсы қыз дейді ғой»— деп шімірікпей койып қалып, койына жүріп кеткен. Жолға шығатын күні де кой соңынан кетті. Түс кезінде мен барып: «Үйге бар, көкем шақырып жатыр. Қісілер де жиналышып қалды. Тез киін, қазір жүресіндер» дегенімде құлқайыр шартактың астынан басын көтеріп маған танымай тұрғандай ажырайып бір қарады да: «Ертең емес пе еді?»— деді. «Жок, бүгін». «Е-е, мен ертең деп жүрсем»— деп шартак астынан еңкейіп шықты да қолымдағы қабакты алып, салқын шалаптан қылқылдата жүтты. Үйдісты ортасына шейін еңсеріп барып, өзіме кайтарып берді. Соңан соң шылбыры шұбатылып жайылып жүрген күрең қасқаның ауыздығын салды, тартпасын тартты. Сөйтті де, атына асықпай отырып: «Байқа, койлар шашырап кетпесін... і-і, менімен бірге тағы кімдер баратын болыпты?»— деді.—«Білмеймін».

Ол үзенгісін тебініп қалып, үйге қарай бетtedі. Сол бойы артына қараған жок. Мен оның ат үстіндегі алып тұлғасы қыр астына тасаланғанша соңынан көз алмай қарап тұрдым.

Ұбыштар екі күннен кейін күн бата бергенде келді. Біздің үй Аршабай деген өзеннің жиегіне тігілген. Өзен дегенде бұл шалқып жатқан сулы өзен емес. Ені жарты шақырымдай келетін үлкен арина. Басы сонау Қазықұрттан шығады. Аяғы бірте-бірте жайпауыттанып барып Арысқа жетеді де теп-тегіс жазыққа айналып кетеді. Бір заманда бұл жерде сұы мол өзен болған деседі. Оған осы арнаның қатпар-қатпар тастаны мен ұлтанын кіндік бойы қазсаң шыға келетін қыршық құмдары күэ. Қазір арнаның бойы малға таптырмайтын жайылым. Құлқайыр, шағыр, бетеге, кеурек, сасыр дегендерің үйиса өскен. Арасына кірген мал шүйгіп шөпке кенедей жабысып, бас көтермей қалады. Арнаның қақ ортасындағы жол арқылы арлы-берлі өткен машиналар мен мал тұғынан көтерілген шаң құлқайырлардың үстінде үлдіректей қалықтап, кешкілік бұл маңайды әсем бір көрініске бөлейді.

Ұбыштар дәл осында өзеннің сонау түкпірінен көрінді. Тойға жиналған елу шақты адам үйден үдерे шығып, өздерінше гу-гу сөйлесіп қыр басынан бақылап тұр. 4—5 жігіт пен 5—6 қыз-келіншек бұдан әрі

шыдап тұра алмай, көнілді құлкіге көміліп, келе жатқандарға қарсы жүрді.

Мен де, апам да солармен бірге кеттік. Апам қуаныштан құліп жүр, жылап жүр. Көзінен аққан жасты байқайтын емес. Қара баласынан да, келінінен де «айнала» береді.

Олар мінген машина бізге әбден жақындағы. Бұл орталықтан бізге жиі келіп, кино көрсетіп кететін шофер Аманкелдінің автоклубы болатын. Экем ол бір келгендеге жалынып-жалпайып жүріп әзер көндірген.

Машинадан түскенде Ыбышты танымай қалдым. Екі күннің ішінде өзі құрт өзгеріп кеткен секілді ме, қалай? Күнге күйіп май сінген топырактай болған қоңырқай жүзіне қан теуіп, коңқақ мұрны делдие қапты. Басындағы сабан шляпасы мен үстіндегі көк бешпеті сом денесіне жабысып, өзін мүсіндендіре түскен. Ол ешқайсымызға сәлем берген жоқ. Ешқайсымызға бұрылып та қарамады. Тек апама жеткенде ғана аздап кідіріп бетінен сүйгізді де, одан алыста, дөң басында бес-алты шалмен мәслихаттасып тұрған әкеме қарай кетті. «Ыбыш!» деп соңынан ентелей бергенімде ол артына бұрылып та қарамаған бойы «қал» дегендей күректей алақанын жай бір сілтей салды. Не болса да мен осы сотте оның аршынды адымы мен ұстамды жүзіне, алып тұлғасына, тұа қалыптасқан қаталдығы мен әкеме шексіз ұнайтын асқан сабырлылығына сүйсінгендей болдым.

...Той қызығы үш күнге созылды. Жастар жағы екі күн бойы сауық күрды.

Кең жайлау, кең дала. Аршабай өзенінің көгілдір аспанын жастар әні қеулеп жатыр. Туған дала ерке ұлдарын құшағына ап, солармен бірге қосыла әндетеңді, қосыла құледі, қосыла қуанады. Өзіне тартып туған сауықшыл ұл-қыздары күміс нұрға толы айлы түнде ақ сүйек ойнады, топ-тоң болып ойпаң мен қыр басында ән салды, домбыра тартты, енді бірде балғын балалық шаққа бір мезет қайта оралып жұпар иісті көк шағырдың арасында жасырынбак ойнады. Әзілкой сылкым женгелер гүл атқан құлқайыр түбінде көрікті, өнершіл қайнысымен шаршағанша алысты, кейбір жас бойжеткендердің жігітке деген нәзік сезімі осы айлы түндерде алғаш оянды.

Кісілерді күту қамымен жүріп, мен ол сауық-сайраның біріне де түгел қатыса алмадым. Күндіз қой соңына кезек-кезек салып қойған жас балаларға сене бермей

мал жаюға кетсем, үйге жеткенде самаурын қою, ботқа тарату, ат байлау дегендерден-ақ қолым тимейді.

Үшінші күні тұс ауа мал сонында жүргенде бір бала ентігіп жетіп келді. «Қайыркен көке, мен осында қалам, сізді тез жетсін деп жатыр, келіншектің бетін ашасыз»,— деді.

Міне саған! Тапқан еken бет аштын кісіні! Ішырау, анау сайдың тасындағы сақырлап жүрген жігіттердің арасынан біреуі табылмағаны ма сонда? Туған қайнысына бет аштыру ерсін емес пе?!

Үйге жеткенде, жұрт арнайы салған үлкен ши бастырманың астында гу-гу сөйлесіп отыр еken. Шынында, жайшылықта ауыз жаппайтын кейбір жігіттер жемежемге келгенде сөз таба алмай, ортаға сүйресе де шықпай отырса керек.

«Ай, үнің өшпейтін темір жак едің, қане, көрсетші сол өнерінді»— деп қояды әйелдер жағы екі күн бойы жеңгелерге қырғидай тиіп жүрген үзын бойлы бұйра бас жігітке қарап. Ол болса: «Түу, өстіп ескілікке салынудың керегі қанша. Комсомольская свадьба жасау керек еді ғой»,— деп тыржып қояды. «Немене қыл дейді, ей, мына сорайған неме,— деп отырған кемпірлердің бірі оның сөзін жақтырмай қалды.— Сонда той қызығын сендер көресіңдер, мына біз немене көреміз? Ескілік деуін түге. Бет ашқанның несі ескілік. Ол халықтың жоралғысы. Ана Қайыркеннің тойында-ақ жасарсындар кәмсәмол суәдбәсін. Суәдба ма, немене еді әлгі... Эптің құрғырдың суәдбәшілін әліне қарамай. Одан да екі сөздің басын құрастыра алмаймыз десендерші. «Жайшылықта ауыз жаппас, той дегенде бірін таппас» деген. Ай, Қайыркен, кел айналайын, мышалардан күн шыкқалы түк шығатын емес. Туған қайнысы болса қайтеді дейсің. Кәзитке өлеңің шығып жүруші еді ғой, селтендеп күлуден басқаны білмейтін мына өңшең ынжық немелердің аузына құм құйып кетші. Эй, кара келін, үйден жіңішке оқтауды алып шық»,— деп ол орнынан тұрып келіп қолындағы ақ шаршысын маған ұстатты.

Мен не істерімді білмей аңырып қалдым. Соншалықты сеніммен бастырмалатып келіп қолыма ақ шаршысын ұстатқан соң бас тартуға мұршам болмай қалды. Ана жастар жағы болса, үялма, қысылма, давай-давай» деп отка май құйып жатыр. Бет ашуға да үлкен қабілет керек. Тіліп түсетін өткір сөзді аяқ астынан тауып, осы отырғандардың бір кемшілігін уытты сынға алу керек. Ол арға тиетін жалаң сын емес, жұрт құлетін,

әзілмен астасып жатқан сын болуы керек. Осы сын садағына кісілердің үлкен-кішісі, ақ сақалы мен қара сақалы жаппай іліге береді, және бет ашушыға ешкім ренжімеуі керек. Не болса да ішінде кетсін. Эрине, кейбір шыныдай шырт ете қалатындар шыдай алмай әлденені айтып салады. Бірак жұрт оны одан бетер күлкіге айналдырып, көпке шейін сөз етіп жүретін болады.

Менің өлең жазатын жыным бар екені рас еді. Бірак, жұрт алдына ешқашан шығып көрген емен. Оның үстінен, қапелімде қойылған талап дегбірімді кетіріп, есімді алды. Қолыма оқтауды қалай үстап, оған ақ шаршыны қалай байлағанымды да білмеймін. Бір сәтте есімді жиғандай айналама қарағанда мені тескілеп, түйрелеп баражатқан сансыз көз бен сөз күтіп телміре қалған жүздерді көрдім. Енді кейін шегінуге болмайды, не де болса тәуекел!

Мен сол кезде ғана үш-төрт қыздың ортасында бетіне сәусілдеген ақ жібек орамал жауып, үнсіз тұрған жеңешемді көрдім. Оның бойы сұңғак, менен екі елідей ғана аласа екен. Үлбіреген жұқа ақ орамалдың ар жағынан қеудесіне басқан қолының саусактары ағарып көрінеді. Ол тіпті дем алмайтын сияқты. Қеудесі мен екі иығының қозғалғаны байқалар емес. Кеше кісілердің атын отқа қойып келе жатқанымда, біrnеше қыз-келіншектермен бірге жеңешемнің анау дөң астында әңгімелесіп отырғанын көргенмін. Күн енді ғана көтеріліп, көкпенбек Аршабай өзенінің аңғары алтын нұрға шомылып жатқан шағы еді. Жеңешем орамалын иығына салып, қыз-келіншектермен сойлесіп отыр екен. Қасындағы Балакұл деген жас әйел саусағымен мен жакты нұскап, әлдене деп жатқанын байқап қалдым. Сол сәтте оның мені жеңешеме сырттай таныстырып: «анау сениң туған қайның болады» деп түсіндіріп жатқаның сездім де, оларға бұдан әрі жақындауға батылым жетпей үйге қарай қиғаштай тарттым. Сол кезде Балакұл: «Әй, Қайыркен, мұнда кел, мұнда кел»,— деп қол бұлғады. Күнге шағылыскан білезігімен қоңілді күлкісінің сыңғырағаны қоса естілді. Олардың қасына барсам жеңешем қолайсызданар дедім де: «Балакұл, қолым тимей жүр» деп айқайладым. Таңғы дауысым хош иісі аңқыған кең алқапқа сіңіп кетті. Ол дауысым тына бергенде Балакұлдің: «Әй, ұялшақ, келіп таныспай ма екен-ей қайта»,— деп соңғы жағын күлкі көмген ашық үнің естіп қалдым.

Казір соным үшін де қысыламын. Сонда да болса тершіген мандайымды алақаныммен сұртіп, тамағымды бір кенеп алдым да, алғаш аузыма түскен салтанатты екі-үш шумакты шұбырта жөнелдім. Соңан соң ең негізгі жауапты бөлімге көштім. Тойға келген адамдардың бәрі маған таныс. Демек, олардың әрқайсысының бір міндері бар екенін де білемін.

Жарым сағатқа созылған ауыр минуттарды артқа тастап, ең соңғы салтанатты шумакты айтып болған соң жеңешемнің бетіндегі орамалды жайымен жоғары серпідім. Ол кірпігін жоғары көтеріп маған бір қарады да, көзін тез төмен түсіре қойды. Оның жанары ботаның жанарындай үлкен, кірпіктері наизадай ірі екен. Толған айдай ақ жүзіне қысылғаннан қан ойнал шыға келіп, екі беті жаңа піскен алмадай албырап жүре берді. Шағаланың қанаты тәрізді қылған қастары үйқысынан жана оянған жас баладай бейкүнә, нәк жүзіне ерекше бір сұлулық пен нәзіктік сеуіп тұр. Үлбіреген еріндері қатты ыңғайсызданғандықтан болар-болмас дір-дір етеді.

Мен жіңішке оқтауды қасымдағы біреуге ұстата салып екі адым кейін шегіндім. Сол жағымда отырған екі-үш әйелдің: «О ренді екен, сабазың. Үндемей жүріп мына Ұбыш бәрінен озды. Құдай кейбіреулерге өстіп бере салады. Анау Рысбектің Тәшкеннен оқу бітіріп келген баласының әйелі... ойбұй, шешей-ау, несін айтасың, мына келіннің тырнағына да тұрмайды. Мұрны біздей, көзі тұздай...»— деп пыш-пыш сөйлесіп жатқандарын құлагым шалып қалды.

Иә, менің жеңешем айтса айтқандай көрікті еді. Әлгі әйелдердің сөзіне мен іштей масаттандым. Сөйтіп тұрып, жүрттан шеткері, тойдан қалған күрішке толы ала қаптың ұстінде жалтыр басын ауық-ауық бір сипап қойып, қою шай үрттап отырған Ұбышқа қарадым. Егер, жеңешемнің ақылы көркіне сай бол келсе, шындығында ол жар сүюден бақытты жан еді. Бірак, өзінің осындағы бақыттылығына ой жіберіп жатқан Ұбыш жоқ. Жейдесінің түймесін түгел ағытып тастап, бәз-баяғы қалпынша әлдене жайлы әкеммен сөйлесіп қойып жайбарақат отыр. Осы сэтте мен Ұбышты емес әкемді кінәладым. Оны уысынан шығармай осылай тәрбиелеген сол емес пе? Ол Ұбыштың осы мінезіне сүйсінеді, мақтан етеді. Оқу-оқу деп жүріп өзінің тәк-тәгінен қағажу қалып, еркіндеу ер жеткен менің барлық мінезімді әкем сондықтан да жаратпайды. Оның ойынша «менің үйге тигізер

Ірістей де пайдам жоқ, есіл-дертім дала. Шошаңдал жүріп не мылтыққа түсіп, не машина қағып өліп қалма-сам, жасым жиырмаға жетер-жетпесте еркек шашты біреуге үйленемін де, әке-шеше дегенді ұмытып, соның айтқанына көніп, айдауына жүріп, әлгінің қалаған жағына лағып кетемін». Мұндай қылықтың ұшын байқата қоймасам да, әкемнің бұл қорытындыға қалай келіп жүргендігі маған әлі жұмбак. Әсте, өзімен кей сәттөрде бетке келіп, тіпті Үбышқа да: «Әй, тілің бар ма, жазығым жоқ деп айтсаншы»,— дейтінім үшін жек көретін болар.

Ертең той тарқаған соң көкпар беріледі. Жұмыстан қолы босап жиналатын аттылар болса, Аршабай нағыз көкпардың мекені. Кауіптенетін жыра-апан жоқ, ұзыннан-ұзақ созылып жатқан мидай тегіс ойпаң. Алысқа шабар жүйрік аттың тізгінін бос тастап, армансыз ағызатын-ақ жер. Қазір Үбыш пен әкем, сөз жоқ, көкпар жайын сөз етіп отыр. Эні, Үбыштың сыпыра құлағы қалқып, көзі ежірейіп кетілті. Шай ішуді мұлде ұмытқан. Япыр-ау, сонда ол өзгенің емес, өз тойында көкпар шаппақшы ма?

Келіншектің беті ашылған соң барлық адамға желік берген думан қызығы бірден сылқ түсіп, арада бірер сағат өткеннен кейін жиналғандар той иесімен қош айтыса бастады. Кешке қарай ертеңгі көкпарға қалған жұмысы жоқ шалдар жағы болмаса, қыз-келіншек, бала-шаға, жігіт-желең, кемпір-кешектердің бәрі бірі атқа, бірі есекке мінгесіп, енді бір тобы Аманкелдінің автоклубына сыйғанынша отырып, ырду-дырду, у-шумен үйді-үйіне тарасты.

* * *

Той да өтті, Үбыштың есін алған көкпар да өтті. Аршабай алқабындағы біздің үй тағы да жалғыз қалып, ың-шыңсыз бір қалыпты өміріне қайта кірісті. Екі-үш күнге созылған той-думанына әбден үйреніп-ақ қалған екенмін, көпкө шейін жаным құлазып, айдалада жалғыз өзім қалғандай кеудемнен белгісіз бір көңілсіздік кетпей койды. Сондықтан, құдық басы мен үй ішінің, қоракопсының тағы-тағы жанымды жабырқата түсетін сүрексіз тіршілікті өзгелерге тастап, далаға; кой соңына кетіп жүрдім. Қара тұмсықтың арғы бауырына түсіп малды отқа жабамын да, бірауық Аршабайдың көз жетілес көк аспанынан көз алмай шалқалап бір жатамын.

Осы шак қандай тамаша шіркін! Төңіректе қойлардың бытыр-бытыр жайылып жүргенінен өзге бір дыбыс естілмейді. Ту көз ұшында, қақ маңдайыңың үстінде ноқаттай бол боз торғай қалықтай ән салып жүреді. Жер иісі, жусан иісі, қурай мен құлқайыр иісі кеудендей кернеп, жан сарайыңа жаңа сезім, жаңа қуаныш толтырады, алпыс екі тамырыңды түгел матап, еліктіріп, еліттіріп әкетеді. Бойыңдағы енжарлық пен көңілсіздік кенет ғайып болып, күллі денең ду-ду ете түседі де, жүрегінді белгісіз бір қуаныш билей жөнеледі.

Сол кезде мен әндетеңін. Әлгі көкірегімдегі шаттық сыртқа шығар саңылау іздел, ішкі дүниенде мың саусағымен тұрткілеп жатады. Әнгө мейірімім қанбайды. Соңан соң өлең жазамын. Осы кезге шейін қанша дәптер толтырдым мен! Бірак, бірі маған ұнаған емес. Төбемдегі көгілдір аспан, шырылдаған боз торғай, кешкілік жұмак бол кететін Аршабай алқабы, тамылжыған айлы тұні — бәрі-бәрі де кей сэтте маған ренжіп түрғандай бол көрінеді. Өйткені, менің өлеңімдегі сұлулық, сол сұлулықтардың бір-ак ұшқыны тәрізді. Кейде өзіммен-өзім арпалысып отырып қойлардың қалың бүрген арасына шашырап кеткенін, я болмаса алтын күннің қызыры ұясына еніп бара жатқанын байқамай қаламын. Кешкілік койды айдастып кетуге не әкем, не Ұбыш келеді. Әкем келсе менің адам болуымның киын екенін тағы бір есіме салып, ұрысып жүріп қойларды жинайды, Ұбыш келсе менімен ісі де болмай үндеңген бойы малды топтап қораға айдайды.

Оның үйленгеніне де жиырма шақты күн болып қалды. Эйтсе де, бәз-баяғы қалпы. Тәні мен жанына инедей де өзгеріс енбеген. Осы кезге шейін мен оның Салтанат пен сөйлескенін бір көрген жокпын. Той өткен соң оларға төрт қанатты бөлек үй тігіп, жеке шығарғанбыз. Бізден қысылып сол жакта сөйлеспесе, көзімізше тілдескен емес. Жаңа ортаға келген жас адам мынадай сұық үйден жабырқап, жалғызырап жүр-ау деп Салтанатқа қатты жаным ашыды. Кейде оның сыңғыр ете түскен күлкісін естіп қалсам, арқамнан ауыр жүк түскендей қуанып сала беремін.

Салтанаттың мінез-құлқы мен армандағандай бол шықты. Ол той өткен соң-ак үй-ішікің тірлігіне араласып кетті. Апам алғашқы кезде: «ойбүй, қарағым, өзім-ак істеймін. Бұл тірлік біткен бе, кейін де жетер, әлден не қыласың», — деп шыр-шыр етіп оны ауыр жұмысқа

ЖОЛАТИАЙДЫ. Бірақ ол: «кейін тірлік болса бола жатар, апа. Жұмыссыз қайтіп отырамын, маған беріңіз»,— дегап апамның иығынан әкпішін алып сонау құдықтағы суға кетеді, не нәкәлай заманынан қалған нән сары самауырды майыса көтеріп далаға ап шығады.

Міне, қазір де ол төрт құлакты қара қазанды жер ошаққа асып, ішіне ернеулете су құйып жатыр. Күн батып, қызылы сөнген шақ. Бүгін желкем жоқ болған соң қойларды есік алдына иіріп тастағанбыз. Салтанат бір құшак кепкен қурай әкеп отқа салды да, сіріңке шағып от жақты. Сүйік көкшіл тұтін қазан үстінен созамықтанып барды да тілдей жалын бұрқ ете қалды. Сәлден соң тұтін жойылды да, ол үлкен жалынға айналып, қурайлар шытырлай жөнелді. Қызыл жалқын от жағрығымен Салтанаттың сұлу тұлғасы, қыр мұрыны мен дөңгелек жүзі ап-анық көрінеді.

— Кайыркен,— деді ол бір кезде жалын тасасынан шығып.

— Эу.

— Сен ошақ қаза аласың ба?

— Қайдам... Бірақ, несі бар дейсің.

— Онда, басқа жерден жақсылап жаңасын қазып берші. Мынау тым терең екен, оттың қызуы қазаңға азбарады. Ыбышқа айтып ем, «өзің қазып ал» дег көнбей қойды. «Колым тимейді»,— дейді. Колы тимейді емес, қолынан келмейді ғой деймін соның, ә? — Сөз соңын оның сыңғырлаған құлкісі көміп кетті. Эдемі құлкі, ерке құлкі. Оның бұл сөзі мен құлкісінде еріне деген жарасымды әжуга, жеңіл ғана байқалmas наз жатыр еді.

— Жарайды, жарайды, қараң отырмын ғой. Қазір-ак қазып берейін.

— Жо-жоқ, қазір шаршап келдің, әрі қараңғы. Ертең қолың босаған кезде, макұл ма? — Ол жас бала се-кілді тұтін кірген көзін екі қолымен құшырлана уқалап бері қарай жүрді. Есік алдындағы ер-тоқымның үстінде домбыра шертіп отырған менің қасыма келіп токтады да.


— «Гауһар тасты» сала аласың ба? — деді еңкейіп.

— «Гауһар тас?» Эн бе?

— Иә, эн. Бірінші рет естіп отырсың ба?

— Жоқ-ә... Домбыраға ән жақсы келмейді дегенім ғой. Одан да күй тартып берейін.

— Жоқ,— деді ол жоғары көтеріп алып.— Күй өз жөнімен, ал домбыраға де жақсы келеді. Бірақ, сен тарта алмайсын.— Салтанат осыны



айтты да үйге кіріп кетті. Мен қатты қысылып қалдым. Оның күлкісі құлағымнан біразға дейін кетпей қойды.

Салтанат апам мен маған өте тез үйреніп кетті. Үйде әкем мен Ыбыш жоқта ол апамды өзіне жақ қып алғып мені мазактайтын да болды. «Дұрыс кой, апа-ә?», «апа, сіз айтыңызшы, солай емес пе?», «апа, оны сіз де біле-сіз ғой» деп менің жасаған кейір оғаштықтарымды құлкігे айналдырады. Апам болса: «е, әрине қарағым, білемін ғой» деп оны бас изеп қостайды да, Салтанатқа одан бетер желік бітіріп қояды. Ара-арасында өзі де ықыластана құліп, мәз-мәйрам бол жадырап қалады. Салтанаттың жеңіл әзілдері кейде жаңыма батып кетеңді. Мен құлағыма шейін қызыарып намыстанип қаламын.

Бір күні менің оған көрген түсімді айтып бергенім бар. Түсімде бір кора қыздың ортасында жалғыз өзім жур екенмін-ау деймін. Қыздардың бәрі де «Мың бір тұндегідей» малына киінген, үрдей сұлу. Мен олардың ортасында отырып ән айтамын, домбыра тартамын. Әр-қайсысымен кезек-кезек алтыбақан тебемін. Сөйтіп жүріп, осы қыздардың ішіндегі ең бір сұлуына ғашық болылпын-ау деймін. Ол да мені құлай сүйеді. Ал, қалған қыздар бізді көре алмай теңізге батырмак болады. Екеуміз қайыққа мініп қашамыз. Олар үлкен-үлкен са-мұрыққа айналып қуады. Қасымдағы қыз ақ шабаққа айналып, мен шортан боламын да, теңіз түбімен жүзіп отырып белгісіз бір жағадан шығады екенбіз. Жағаға жеткенде мен есімнен танып қаламын. Қасымдағы қыз есімді жидырмак бол теңіз суынан бүркеді. Селт етіл көзімді ашамын...

Осы кезде оянып кетіппін. Жаңбыр жауып тұр екен. Қойлар алыска кетіп қалыпты. Мен бүрген арасында кітап оқып жатып мызғып кетсем керек. Осы түсімді айтып бергенімде Салтанат еріндерін сәлғана ашып ықыластана тындарды. Соңғы жағында қыздан бұрын талып қалғанымды келеке етіп рақаттана құлді. Соңан соң менің сұлу әйел алатынымды, өмір жасымның ұзақ болатынын айтып, әлгі түсімді өзінше жорып жатты. Ал, ертесіне мен әлгі түсіме сәйкес екі шумақ өлең жазған болатынын. Мені мазақтап құліп отырған бір күні ол көзімді бакырайтып қойып әлгінің бәрін апама айтып бермесі бар ма? Жерге кіріп кете жаздадым. «Айтпа» деп ернімді тістеп, басымды шайқасам да тындар ол жок, қайта: «әні, қараңызшы, - айтпа деп маған жұды-рыны түйіп тұр. Нанбасаңыз бар ғой, сол қызға арнап жазған өлеңі бар, оқып берейің бе?»— деді.

— Е, оқи қойшы.
— Міне, тыңдаңыз.

Айналам гүлдей ару қыз,
Сезімге мас боп әндettім.
Сүйдім де құшып біреуін,
Тенізді төрлеп мен кеттім.

Азапқа тәңір ризамын,
Көгімде тұrsa күліп ай.
Түсімде көрген сол бір сәт
Өңім боп кетсе, дариға-ай!—

Караңызы, өзі әжептәуір ақын, апа, ә?

Апам не десін, үндеген жөк. Тұсау есіп отырған бойы ақырын езу тартты да қойды. Бұл күлкіден одан бетер қысылдым. Өләнді Салтанатқа бір-ақ рет оқып беріп едім, оны қалай тез жаттап ала қойғанына қайран қалдым.

Апамның алдында мені қатты қолайсыздандырғаның енді ғана байқаған кісіше ол «ештеңе етпейді» дегенді аңғартып, сәл басын изеп көзін жұмды да, далаға шығып кетті.

Тамақ ішіп болған соң сыртқа шықсам, сонау ойпаңдағы құдықтан Ыбыш екеуі қауға тартып жатыр екен. Одан алысыракта жердің ақ тозаңын аспанға көтеріп, суға қарай әкем кой айдаң келе жатыр. Мен солай қарай жүрдім. Ми айналдырар шаңқай тұс. Күздің келгенін білдіріп, сары даламен мизамдар шұбатыла ұшып барады. Олардың бірі құлқайырларға, бірі бүргендерге ілініп, енді біреулері тұра бетіңе келіп желімдей жабысады. Үстық топыракқа бауыры күйген кішкене кесірткелер мен білезіктер зу-зу етіп жолды кесіп өтіп жатыр. Анадай жердегі жусан түбінде ыстықтаған боз торғай аузын ашып, жан-жағына жалт-жалт қарап қояды. Келе жатқан жүргіншіден қауіптеніп, кішкене қанатын қомдал ұшуға әзір отыр.

Мен құдық басына жеткенімде Ыбыш: «Неге келдің?»— деді бетінің терін жеңімен бір тартып.

— Негесі қалай? Жәрдем бермеймін бе? Өзің түйе жетектеп, қауғаны Салтанатқа тартқызып қойғаның қалай?

Ыбыш Салтанат жакқа жай бір қарады да қолын сілтей салды.

— Қауға тартқаннан өледі дейсің бе? Тартсын. Бұрынғының әйелдері қауға тартқан былай тұрсын, қырық құлаш құдық та қазған.

Мына сөз жүргегіме тікендей қадалды. Және, «бул сөзім Салтанаттың көңіліне келеді-ау, ренжиді-ау» деп ойлап тұрған ол жок, келіншегіне назар да аудармастан түйесін жетектей берді. Түйе ана басқа жеткенде қауға да құдық аузына кеп кептелді. «Тарт-ай!» деді ана жактан Үбыш. Салтанат қауғаның жібінен ұстап, нәзік қолымен дірілдей көтерді де, суын астауға актарып жіберіп, бос ыдысты құдыққа қайта таstadtы. Ол кеудесін көтеріп, мандайының терін сұrtkenде, сүйкімді жүзінен Үбышқа деген ешқандай реніштің ізін байқай алмадым. Үстық күннен екі беті алаулаңып, құлпыра түсіпті. Мені көрген бетте күлімсірей қарады да: «Ауыр-ей әжептәуір»,— деді бетінің терін сұrtіп. Мен оның ренжімегендігі үшін іштей қатты қуандым.

Сәлден соң Үбыш біздің қасымызға келіп: «Ақыры келуін келдің, түйені сен жетекте, мен ат суарайын, таң атқалы су ішкен жок»,— деп қара нардың бүйдасын маған ұстатты да өзі сонау кара тұмсықтың бергі баурында тұсаулы жүрген күрен қасқасына карай кетті.

Біз екеуміз қалдық. Үбыш ұзған соң Салтанат: «Әй, осы мені аямайды-әй,— деді күліп,— онысы несі екен. Мені өзі сияқты палуан деп ойлайды ғой деймін бір. Құдыққа келген сайын қауғаны ылғи маған тартқызып, өзі түйе жетектейді. Сөйтіп жүріп жөндеп тартпайсың деп ұрсатыны бар тағы да, астапыралла!..»

Салтанаттың бұл үнінде реніш те, зіл де жок, керісінше, нәзік әйелдің катал еріне деген таңырқауы, сонымен бірге нәзік құрмет пен пәзік сезімі жатыр еді.

— Сен шаршадың ғой, қауғаны маған бер де, түйені жетекте,— дедім Салтанаттың колына шуданы ұстатып. Ол алғашқы кезде: «Шаршаған жоқпын, өзім-ақ тартамын» деп қарсыласты. Соңан соң: «Сен де мен сияқты нәзіксің, құдыққа түсіп кетесің» деп мазактауға көшті. Бұл сөз шымбайыма батып, томсырайып қалдым. Ол басын тәмен салбыратып құдық түбіне қарап отыр. Менің ренжігөнімді байқаған жок. Бір кезде: «Қайыркен, Қайыркен! Ана қарашы, құдық түбінен менің суретім көрініп тұр,— деді. Әлгі сөзіне ренжігөнімді білдірмек бол үнсіз тұра бердім. Сол сэтте ол басын көтеріп құлімсіреген каракаттай жанарын маған қадады да «кел енді» дегендей басын изеді. Мен жай-жай басып оның жанына жакындағым. Оның көңілді сәттерін бұзғым келмеді.

— Қане?

— Эні, қарашы.— Мен құдық түбіне көз таstadtым.

E:\18-09-13\eki-wurmekit\pdf-page-23
Шыныраудың сонау түбінен бізге де өзіміз сияқты екі адам қарап тұрды. Олардың да ар жағында көгілдір тұнық аспан. Біз құлсек олар да құледі, қол шошайтсақ олар да шошайтады. Салтанат кенет тағы сөз бастады.

— Алдың күні мен дәл осы суретті Ыбышқа да көрсөттім...

— Ехе, ол не деді? — Мен елең ете тұстім. Ол мәлдір суға маржан сепкендей сылдырап тағы бір күліп алды да:

— Ол не деуші еді. Ұрсып берді. Денің сау емес сенің, — деді.

Мен еріксіз күліп жібердім. Оған деген әлгі ренішім бір шөкім жазғы бұлттай лезде ыдырап кетті. Содан соң екеулеп жұмысқа кірістік. Ол түйе жетектеді, мен қауға тарттым. Сәлден соң койлар да келіп, үлкен астауға лап қойды. Бірі су ішіп, енді бірі қанатын сулап отырған боз торғайлар тоз-тоз болды.

* * *

Күзгі қырқын маусымы да келіп жетті. Аз күнге созылса да бұл қойшыларды едәуір аласапыранға салып, аяғынан тік тұрғызып кетеді. Кой қырқатын пункт бізден алыста, отыз шакты шақырым жер. Оған барып-келгенше екі-үш күнің кетеді. Ол жақта кезек күтіп жатып қалмасаң бір қора қойды қырқу деген сөз емес. Тұстұстан қайшыларын сырылдатып, жаландатып тұрған қырықтықшылар бір отарыңды түске дейін жалаштап қоя береді.

Алыс жолға жүре алмайтын ауру-сырқау, арық-тұрак саулықтарды корада қалдырып, әкем мен Ыбыштаң алакеуімнен малды айдалап кетті. Жүретін күнге дейін қой қырқымға әкем екеуміз баратын боп отырғанбыз, бірақ, бір күн бұрын кешке колхоздан Аманкелдінің автоклубы жау қуғандай жетіп келіп, құдық басына су тартатын мотор тастап кетті. Колхоз бастығының «моторды құрып беріп қайт» деп жіберген Эскербек деген тракторшы жігіт: «Мотор құру — һайт-шу деп қой айдау емес, сондықтан, гайканың астын ұстап тұруға жарайтын бір көмекші қалсын» деп жер-дүниені топан су алдырған соң әкем «темір-терсектің иісі мұрнына баратын» мені ауылда қалдырыды. Олардың қойын 3—4 шақырымдай келетін Костөбеке шейін айдасып салып, кері қайттым. Үйге таянып, еңістегі жолмен төмен түсे бергенімде сонау Қарататудың ар жағынан қылтиып күн де

көтерілді. Ол өзімен бірге бар әлемнің сұлулығын ала шықты. Кең дала мен қырат біткенді алтын арай арап жүре берді. Аспан тап-таза. Біздің үйдің арқалығына келіп тырнақтай имек ай тұрып қапты. Ол мына далаға түні бойы күміс сәулесін аямай шашамын деп азайып, қалжырап қалған секілді. Менің қарсы алдымағы Аршабай алқабы әлі қара көленке құшағында. Ойпандағы есігі ашық екі үйдің алдында Салтанат ас қамына кірісіп, будактата от жағып жүр. Қекпенбек қи түтіні желсіз тымық ауаға тіп-тік көтеріліп, қыр қойнауларын кеуlep ғайып болып жатыр. Әріректе апамның тауыктарға жем шашып, «ту-ту-ту» деп шақырған таңғы дауысы құлаққа ап-анық естіледі. Қара көленке алқап жақтан оқтын-оқтын лып ете түскен жібек самалмен бірге қи түтінің қоңырқай иісі келеді:

— Ой, айналайын, кешіктің ғой, соншалықты алысқа ұзай бермей-ақ, ана қырдан асырған соң қайта бермедин бе?— деп қарсы алды апам мені үйге келгенде.— Шаршайды деп бір ойласа қайтеді екен. Салтанат, Кағыржанға салқын айран берші.

Апам өзге кемпірлер сияқты «келін» деп жатпай-ақ, оны өз қызындай көріп «Салтанат» деп атап кеткен. Апамның бұлай деуі Салтанатқа да мейлінше ұнайды. Ол менің нақ бір кішкене қарындасым секілді қазаннан құйып алып жатқан сүтін · сол бойы қоя салып «қазір, апа» деп өздерінің кішкене отауларына кіріп кетті де, сәлден соң сырлы зерен тостакты салқын да майлы айранға шөпілдете толтырып әкеп маған ұсынды. Айранды сіміріп жатып қарсы алдында тұрған оған еріксіз көзім түсіп кетті. Даң қазір Салтанат түскеніне 3–4 ай болған келіншектен гөрі, кәмілетке жаңа толып, тұңғыш рет биге барған жас қызға көбірек ұқсайтын еді. Елегінзіген еліктің жанарындай мөлт-мөлт етіп ойнакшыған көздері өз иесінің бейкүнә пәк сезімділігін паш етіп тұрғандай. Бақытты күлкі ойнаған әсем еріндерінің ар жағынан көрінген аппақ әсем тістері төгіле кететін ақ маржан секілді тізіле қалған. Аршабай таңындай арайлы жүзі мен тізесіне төгілген білектей кос бұрымы, ақ тәніне жабысқан көк жібек көйлегі оны бұрынғыдан да құлпыртып, көріктендіре түсіпті.

Тостакты босатып өзіне қайтып бергенімде менің ішіп болуымды күтіп тұрған - ол ыдысты қолына ала беріп:

— Тағы?..— деді сұраулы пішінде басын сәл ғана изеп.

— Жок, жетеді.— Ол тез-тез басып отау үйлеріне кіріп кетті.

Мен қорада қалып қойған бес-алты арық-тұрық мәлді Қаратұмсықтың бауырына айдалап апарып қайтып келдім де үйге кірдім. Ыбыштың бұрынғы сыйырлауық кереуеті маған тиген. Қазір онда Эскербек жатыр. Үйге кіріп келсем, ол басы қазандай бол әлі үйықтап жатыр екен. «Шаршап жүрген ғой, біраз үйықтай тұрсын» деп қайта шықтым. Сонау құдық басындағы моторға барып, ары-бері шұқылап көріп те қайттым. Күн де көтеріліп кетті. Енді сәлден кейін ыси бастайды. Осы кезде үй жақтан: «Қайыр-ке-ен» деп айқайлаған дауыс естілді. Солай қарай көз тастадым. Ағаш бөшкенің үстіне шығып, кол бұлғап шақырып тұрған Салтанатты көрдім. Демек, тамақ дайын болғаны ғой. Астаудағы суға жуынып болған соң жолай сұртініп, жалғыз аяқ жолмен үйге қарай жүгіре жөнелдім. Келсем, Эскербек далада жүр екен. Бақан бойы көтеріліп қалған күнге көзін сығырайта қарап, есінеп қояды. Мені көрген соң екі бүйірін таянып берірек жақындағы да:

— Қайдан келесің? — деді өз сұрағына ешқандай да мән бермей енжарға.

— Құдық жақтан.

— Моторды көрдің бе?

— Иә.

— Байқа, шұқылай берме, бұзып аласың.— Ол осыны айтты да теріс айналып маңыздана бір қақырынып койды. Мені бір түк білмейтін жас бала көріп тұр шамасы.

— Ту, қалай өмір сүресіндер-ей, жалғыз,— деді әлден соң ол айналасына қарап.— Жарылып кетпей қайтіп жүрсіндер. Мен байлаң қойса да тұрмас едім. Бұл жerde тансы да болмайтын шығар.

— Болады, неге болмайды,— дедім қыжырым қайнап.

— Е, қойшы, кімдер билейді?

— Кошқарлар мен саулықтар.

— Ой, шегірткенің айғырындай болған неме, үлкен адаммен қалай сөйлесесің өзің?! Тілін қара. Сендердің мені сыйлауларың керек. Мен сендерге мотор құрып беремін, білдің бе, мотор!— Осыдан соң ол ренжіген кейіп көрсетіп, тышқан қазып тастаған төмпешіктің үстінде көпке шейін үнсіз отырды да:

— Үйлерінде арак бар ма?— деді дауысын бәсекедетіп.